



ル 5
3150
14



門 儿 5
號 3150
卷 14

黔南識略卷二十一

貴州巡撫長白愛必達撰

黎平府

黎平府在省城東南八百八十里古荊州荒裔秦屬黔中郡漢屬武陵郡隋屬沅陵郡唐置巫州旋改敘州宋為誠州地元置上里坪長官司屬思州安撫司明洪武初改置蠻夷軍民長官司十八年置五開衛隸湖廣永樂十一年廢宣慰司置黎平府於五開衛領潭溪八舟洪舟曹滴西山福祿永從七蠻夷長官司並置新化府領湖耳亮砦歐陽新化中林驗洞龍

里六蠻夷長官司及赤溪涵洞長官司屬貴州布政司宣德九年新化府廢以所領俱屬黎平府宏化八年省福祿司置永從縣萬曆二十八年改隸湖廣三十一年還隸貴州

國朝因之設知府一教授一訓導一經歷一吏目一其境東至下洪州寨與湖南靖州通道縣流團屯界一百里西至古州廳屬平宇寨與都勻府獨山州屬壩皆寨界四百八十里南至永從縣屬恪里寨與廣西羅城縣屬石牌界一百七十里北至茅坪寨與鎮遠府天柱縣屬奔處寨界一百八十里東南至牙霜寨

與廣西懷遠縣屬古泥寨界一百二十里西南至古州廳屬俾賴寨與都勻府荔波縣屬山洞寨界三百六十里東北至開泰縣屬黃家坳與靖州洪江橋界一百二十里西北至文斗寨與鎮遠府柳霽縣丞屬孑杆寨界一百七十里由府七千里達於

京師郡境斗絕一隅距省最遠明時僅轄永從一縣層巒密箐向爲苗蠻巢穴宣德十年始自官團移治五開衛城時衛軍有六新軍以禦苗爲名號曰欵軍常與五司苗眾糾聚攻劫致有六譁五譁之稱銅鼓靖州中潮龍里諸處皆應之經用大師始克剿除

黔西通志卷二十一
國朝康熙中巡撫田雯以府隸黔衛隸楚同城非便且
黎平爲苗多民少之地設有機宜兩地盼懸呼吸未
應疏請統歸一省後總督高其倬亦疏言貴州形勢
都勻以東黎平以西中夾生苗一區名曰古州八萬
地大苗眾正須料理以五開歸黔則一切措辦呼應
卽靈若撥黎平歸楚凡有調度必失事機雍正五年
遂以五開衛改縣來屬又以湖廣之銅鼓衛改錦屏
縣並靖州之天柱縣來屬十一年天柱改屬鎮遠府
七年開闢古州增設古州同知乾隆三十六年增設
下江通判道光十二年改錦屏縣爲錦屏鄉設縣丞

屬開泰縣共領廳二縣二屬貴東道黔中苗疆重地
也城周八里計一千二百三十四丈初爲五開衛城
明洪武十九年創築土城二十三年甃以石高二丈
一尺門四礮臺五其山曰五龍山在城內山勢盤紆
相屬有二澗夾之府城南北跨二山之巔中央山卽
郡治也銅關鐵寨山在潭溪司西南三面陡絕惟南
可登山頂平廣容千餘人明史吳良傳洪武五年廣
西蠻叛副征南將軍鄧愈帥平章李日升出靖州殲
清洞厓山之眾於銅關鐵寨諸蠻皆震攝內附又閩
興邦黔苗叛服始末考皮林苗吳國佐反指揮李楷

破洪州草坪進逼特洞當其險者曰甘坤卽俗名銅關鐵寨破之而入窮追至赤沙至高茶生獲國佐諸洞悉平卽其地也磨盤在潭溪司西北上有石如磨遇旱擊以祈雨八舟山在八舟司有石立如人又名仙人峯又有天橋山亦名灣寨山特洞山在洪舟司西南四面壁立一徑屈曲而躋上平廣有池雖旱不涸平田數百畝皆腴壤明特洞寨苗吳國佐據爲寇卽此又東曰都莫山昔爲苗賊哨聚之所灑洞山在洪舟司西南下有泉名神泉又龍洞山洞寬廣深里許下有龍潭水甚清冷西爲蓮花池黃蘗山在龍里

司明景泰四年溲洞賊由石樁山攻掠古城鄉叅政甄完擊敗之追至黃蘗山卽此大巖山在城南旁連爲小巖山其西爲高峯嶺其西南爲西山東爲天有山大巖江出焉銀賴山在舊三郎司方輿紀要明初俞通海討古州諸蠻洞首克銀賴洞是也天甫山在城西四十里新化江源此程巖山在亮寨司峭壁臨溪狀如覆釜相近有羅丹山又有龍池山少寨洞在城東北四十里下臨少寨河土人云桃花水時遊魚麴至尋源而進可數十里響水洞在湖耳司水自洞出聲震林木獅子巖在城東北一百六十里紆迴百

盤直上千級松氣青滋烟凝霧結經數十里始抵平
坦藕洞在湖耳司層巒疊聳路僅如線中有平田數
十頃明史土司傳苗賊蒙能黨李珍等煽惑苗眾官
軍討禽之克復銅鼓藕洞連破鬼板等一百六十餘
寨是也擒鬼坡在潭溪司閩興邦黎平府論頓洞寨
擒鬼坡路險多怪石明景泰中皮林苗爲寇嘗敗官
軍於此青坡在洪舟司地懸崖陡峭爲赴通道縣必
經之路二黃坡在城南三十里爲永從縣來府必經
之路亘十餘里踰二黃坡卽潘老寨閩興邦黔苗叛
服始末考稱吳國佐反沅撫江鐸遣兵進剿地險不

得入潘老諸酋引眾萬餘盡爲牛首陣當者多傷指
揮李楷從叢箐中取道步騎相持數十里苗又斷溝
畫塹布以竹簽楷所在填接逐步拔簽而後行乃先
擣潘老寨奪其險隘遂進擊賴洞岑朝二寨斬獲酋
渠卽此毛洞坡在城西七十里磴道盤紆峯巒迴互
窺穴多潛匿焉郡之東北以清水江爲界古之沅江
也古州江繞其西南古之牂柯江也新化江出府西
天甫山東北流經八舟新化亮寨湖耳諸司至王寨
會八卦河入於沅潭溪在潭溪司南高鏡溪源出廢
曹滴司南三十里高章溪出廢曹滴司東七十里俱

流合於新化江朗溪在湖耳司亦名楠溪舊流東合
清水江其後南徙土人謂之變溪源出石榴山逕湖
耳司地又逕錦屏鄉西北遶而東又逕湖耳司地入
新化江東茶溪在歐陽司東北源出東茶山流入亮
寨司界合朗溪上黃溪源出灑洞山入洪舟江下流
入於沅古泥江在洪舟司源出靖州由洪州司永從
縣逕懷遠縣入古州江漢書地理志武陵郡鐔成縣
玉山潭水所出東至阿林入鬱過郡二行七百二十
里方輿紀要通道縣南七十里芙蓉江自綏甯界
下流至廣西懷遠縣入古州江明史地理志廣西懷

遠石門山福祿江流逕其中又東北有潯江自湖廣
靖州流合焉古潭潯音同疑卽此水也容江源出廢
曹滴司苗沙山下流入古州江府轄各土司地方潭
溪長官司在府東北明洪武四年石平和以功授長
官司洪武二年石湯從授副長官司今正司住蒙村
府東北四十里副司住黎平寨府南二十五里八舟
長官司在府北明洪武二年吳金骨以功授今住八
舟距城四十里洪舟泊里長官司在府東南元李清
滿原任鎮遠府土僉事明洪武五年改授洪舟泊里
長官司林榮輔亦以是年授副長官司今正司住洪

舟距城九十里副司住黑碕距城七十里古州長官
司在府西明洪武五年楊秀茂以功授正長官司今
住羅里府西七十里新化長官司在府東北元歐陽
明萬以功授長官司今住新化寨距城五十里湖耳
長官司在府東北明洪武四年楊再祿以功授正長
官司楊總管授副長官司今正司住長寨距城一百
二十里副司住高寨距城一百二十里亮寨長官司
在府東北明洪武四年龍正忠以功授正長官司今
住亮寨亦稱諸葛寨距城七十里歐陽長官司在府
東北明洪武四年陽都統以功授正長官司吳子林

授副長官司今正司住歐陽寨距城六十五里副司
住中黃距城六十五里中林長官司在府東北明洪
武五年楊盛賢以功授正長官司今住中林司距城
八十里龍里長官司在府東北明洪武四年楊光福
以功授正長官司今住龍里司距城六十里舊有曹
滴司在府西北康熙二十三年裁赤溪楠洞司在府
東北二十三年裁西山陽洞司在府西南二十五年
裁三郎司土舍明嘉靖三十六年置今住三郎府東
北三十五里凡親轄土司一土舍共正副十五員
惟龍里中林洪舟新化歐陽亮寨胡耳七土司有印

如遇

恩詔

下頒及承領號紙得一用傘旂平時無導從見守令皆庭參入舟龍里新化歐陽四司地方舊設流官吏目各一員雍正十二年裁八舟龍里吏目乾隆三十二年裁潭溪吏目今存洪舟吏目郡城鮮巨室惟趙周陳胡宋五族爲繁鄉則龍楊吳石四姓居多考試向赴鎮遠附棚雍正九年巡撫張廣泗奏請建棚分考原額府學二十名嘉慶十二年減永從學額二名以一名撥入府學一名撥入開泰縣學嘉慶十八年增學額四名共二十五名分棚考試郡城關廂六所

及寄居古州下江民籍爲一棚共取十二名十二司及古州下江苗童爲一棚取十三名以故苗民讀書者眾建有黎陽書院農功視全黔差異上田一畝值二十餘金豐年可收穀七石稍次五六石一夫力耕可至七八畝府轄成熟田二萬六千三百三十六畝有奇額徵地丁銀七百二兩有奇秋米九百八十二石有奇折米七百四十二石有奇俱加一五耗府常平倉貯穀二萬五千四百三石有奇道光元年建立義倉貯穀三百九十五石兵糧於秋折米內支放又歲輓運古州兵糧米二百八十六石零向運朗洞兵

糧四百七十五石今定於每年歲內每米一石照秋
成中米時價一兩三錢徵銀起解產米可敷民食市
價斗米二錢六七分三錢爲最貴二錢爲中平一錢
七八分爲最賤市斗準倉斗一斗五升山多戴土樹
宜杉土人云種杉之地必豫種麥及包穀一二年以
鬆土性欲其易植也杉閱十五六年始有子擇其枝
葉向上者擷其子乃爲良裂口墜地者棄之擇木以
慎其選也春至則先糞土覆以亂草既乾而後焚之
然後撒子於土面護以杉枝厚其氣以禦其芽也秧
初出謂之杉秧既出而復移之分行列界相距以尺

沃之以土膏欲其茂也稍壯見有拳曲者則去之補
以他栽欲其亭亭而上達也樹三五年卽成林二十
年便供斧柯矣郡內自清江以下至茅坪二百里兩
岸翼雲承日無隙土無漏陰棟梁桷杗之材靡不備
具坎坎之聲鏗訇空谷商賈絡繹於道編巨筏放之
大江轉運於江淮間者產於此也然郡之多盜亦以
此楚粵奸民往往混跡於工匠之內恣爲搶竊茅坪
王寨卦治三處商旅幾數十萬距府治幾二百餘里
前經貴東道會同總兵官於三處地方設卡巡緝派
撥兵役互相稽查稍稍斂迹然其地距楚最近奸徒

揚帆而下須臾間耳苗有六種硃苗向化已久男子耕鑿誦讀與漢民無異其婦女漢裝弓足者與漢人通姻花衣苗白衣苗黑脚水西苗近亦多薙髮讀書應試惟婦女服飾仍習舊俗黑苗蓄髮者居多衣尚黑短不及膝十年畜牝牛祭天地祖先謂之喫牯臟勤於耕織鮮知文字又一種曰陽洞羅漢苗婦人縮髻額前插木梳其上富者以金銀作連環墜耳織錦爲衣繫雙帶結於胸前刺繡一方以銀錢飾之長襖短裙數日必淅水沃髮婚姻多不避同姓姑家養女定爲舅媳否乃卜他族母家嫁女助奩多以田畝終

女之身仍歸母家相沿已久未能盡禁也通屬苗寨四百有九十寨設一營五汛百有七塘城中駐劄黎平營叅將一員本設協雍正七年改遊擊乾隆二年改叅將守備二員內分防一員千總二員內分防一員把總六員內分防二員外委七員內分防四員額外四員兵八百十名除錦屏永從二汛各駐弁兵外存城兵四百十名分防王寨汛把總一員兵七十六名平茶汛外委一員兵四十九名龍里司汛外委一員兵四十九名各塘兵一百五名四至皆僻徑東南有二路一出靖州通道縣一出廣西柳州

府懷遠縣無驛遞有亮江河一渡口每年府屬應入
秋審人犯由貴東道就近省辦移司核轉道光十二
年奏著爲令以其距省獨遠故也餘與他郡同
論曰黔省財賦所入不敵江南一大州縣其建營置
伍軍餉所需咸資外省協濟焉其月支兵米經前人
截贏就縮於本省地方逐處經畫有變價申解以待
糧道之撥發者有逕自輓運以待隣境之接收者有
按程接運以紆道遠之勞苦者計每歲通省應徵改
徵米石適以敷通省之兵糧而乾餉不與焉前猶歲
運粵米一萬石供給古州後議以都勻府都勻縣清

平獨山三腳八寨六處及黎平開泰經歷三處籌備
供運而都勻所屬之三腳聖州同實總六處之要會
故其地設古州倉焉貴州之積貯爲最要矣而下游
之黎平爲尤甚上游不通商販其價賤而民多蓋藏
黎平橫介楚粵爲苗疆重地通舟楫民稍積聚輒轉
售於外境故其價昂而儲蓄亦寡苗人皆食雜糧其
收穫稻米除納賦之外皆運售楚省者也地方官於
常平倉穀每歲詳請出糶平價固屬遵例奉行但恐
奸民借以轉售他省是本處之穀日稀而猝逢饑饉
之歲轉無以應之且平糶之後往往以價昂艱於買

黔南識略卷二十一終
補轉於積貯之政未見有益嗣後似宜於社倉義倉
由民經營者聽其照舊平糶外有常平倉穀非遇實
在歉歲有司不得率請平糶此非獨慎重倉儲之道
亦杜絕胥吏侵挪之一端也國初軍興之時鑿黃平
諸葛洞以漕楚粟今幸大有屢豐各府州縣所貯較
雍正時原額增至十倍有司官吏當如何思所以慎
守歟

黔南識略卷二十一終

黔南識略卷二十二

貴州巡撫長白愛必達撰

古州同知

古州同知在府治西一百八十里省城東南六百七
十里唐古州興樂郡貞觀十二年開夷獠置屬嶺南
道宋置古州刺史元至元中設古州八萬洞軍民總
管府屬思州安撫司隸湖廣行省明洪武五年吳良
平五開古州諸蠻三十年楚王楨湘王柏帥師討古
州蠻皆遙以名號相羈縻未真隸版籍也

國朝雍正七年總督鄂爾泰巡撫張廣泗用兵討平之

始設同知治其地與清江台拱八寨丹江都江同時
建置爲新疆六廳其境東至府屬增盈寨界三十里
西至都勻府都江通判屬喬包寨界一百五十里南
至荔波縣屬山洞寨界一百八十里北至清江通判
屬稽寨界一百八十里東南至下江通判屬傳洞寨
界四十里東北至府屬巴王寨界九十里西南至都
江通判屬壩皆寨界一百五十里西北至丹江通判
屬牛皮箐界一百一十里地分上中下三保廳城在
三保之中舊爲諸葛營枕山面江川原平衍城周五
里計九百四十四丈其西北六十里以滾縱汎爲關

隘出丹江廳及牛皮箐間道也石城周二里四百五
丈正北十五里以王嶺汎爲關隘出朗洞大道也土
城周二百五十丈東北三十里以八匡汎爲關隘進
府大道也土城周五十二丈西南三十里爲小都江
汎土城周一百三十三丈又六十里爲八開汎土城
周一百三十一丈又九十里爲定旦汎土城周三百
六十五丈都江水程之關隘也正北五十里爲嶺賈
汎土城周九十二丈又九十里爲寨嵩汎土城周一
百五十丈又一百一十里爲高表汎土城周一百五
十丈出朗洞達清江之關隘也筆架山在城東北十

里三峯聳秀因形以名五榕山在城南隔河一里有
五榕樹連蜷樛結望之如蓋俾飛山在城西南與擺
刺山對峙四方山在城西十里羣山環聚一坪中坦
周圍數里榕江在城西北發源於清江台拱界南瓦
山經奔波潭至城北三里與車江會車江在城西北
因繞車寨得名發源於清江高亮山經府屬育洞南
流與榕江會逕城東繞而南與都江會古州江發源
於都勻府地東流至都江廳城西南謂之都江又逕
廳城匯榕江車江西折而南過下江及丙妹入廣西
懷遠雒容二縣界至廣東南海縣入海漢書稱牂柯

江廣數里出番禺城下唐蒙上書所謂夜郎精兵可
得十萬浮船牂柯江出不意制粵者當此水也水經
注豚水東北流逕談藁縣東逕牂柯郡且蘭謂之牂
柯水按牂柯江郭記以爲在定番田書以爲卽烏江
皆附會穿鑿無有以是水實之者良以蠻地阻絕源
流莫溯雍正年間逆苗滋擾梗塞河道總督鄂爾泰
奏都江一水來自黔之都勻直達廣西之柳慶沿江
山洞諸苗多未歸附非用粵兵協剿難以開通乃調
廣西官兵克之平定後檄文武員弁通勘上下兩江
上自三脚壘至三洞下自諸葛洞至溶洞濬淺灘辟

險磧伐巨林鑿怪石舟楫郵遞往來如駛蓋唐蒙故
道閉寨數千載至我

朝鑿江開道從古化外之城今爲水陸通莊矣朗洞江
在城西北一百五十里水有二源一發源遂里寨一
發源高頓寨逕朗洞城東合爲一川流入清江廳屬
木柀皆由此江達於楚諸葛洞在車江溶江都江合
流處洞口甚狹水瀦爲潭雨大不溢乾旱不涸俗稱
昔有善泅者入見有石几云諸葛臺在廳署前昔爲
箐林相傳武侯屯兵處苗人不敢入雍正間同知毛
振翽築臺立碑誌其事廳設左右兩衛各千總一員

左衛駐王嶺轄二十二堡共安軍一千六百八十一
戶曰恩榮曰仁育曰義正曰德化曰興隆曰昇平曰
增盛曰安樂曰忠誠曰和順曰永清曰錫慶曰長治
曰修文曰太平曰鳴鳳曰懷來曰玉麟曰嘉會曰清
甯曰靖遠曰鎮安右衛駐寨嵩轄一十八堡共安軍
八百三十八戶曰壽昌曰太元曰咸亨曰富有曰普
安上下曰平定曰敦仁曰崇義曰維新曰福善上下
曰順甯上下曰建威曰信誠上下曰宣化凡四十堡
各堡築有土垣屯軍所領田畝分上中下三則每畝
上田徵米一斗中八升下六升每戶上田授六畝中

八畝下十畝計上田六千三百三十六畝中田一萬一千六十畝下田六百八十畝共田一萬八千一百七十六畝額徵米一千五百六十七石二斗每歲支銷百戶總小旗工食米一千一百七十三石供捺演鉛藥等用米一百五十石有奇餘米各衛弁變價解司各堡每屯軍一戶酌畱籽種穀折米一石共酌畱米二千五百一十九石苗田不計畝地丁錢糧均於雍正十三年奉

旨蠲免永不徵收常平倉貯穀二萬六千四百四十石有奇左衛常平倉分貯穀四千七百四十八石右衛分

貯穀二千三百六十六石乾隆五年奉

上諭

各屯軍未領建築城牆小工銀兩覆令買穀分貯各堡每軍買貯社穀四石二斗五升七合七勺兩衛共貯穀一萬七百二十八石有奇向未設立學校雍正八年於口月章魯車寨三處各設義學一所又十一年十二年樂鄉寨麻蠟子朗洞等處捐設義學六所現童生應試附入府屬十二司分額十三名內考試其寄居民籍附入關廂額取十二名內考試書院在城北隅駐城兵備道一員乾隆二年設同知一員係開闢時移黎平府同知分駐照磨一員係設廳時將黎

平府照磨移駐乾隆元年設倉大使一員今裁朗洞
縣丞一員駐朗洞距廳城一百五十里建有石城係
乾隆二年設營時移開泰縣丞駐於此鎮標原額三
營共馬步守兵三千名乾隆二年裁兵六百名七年
裁馬兵七十二名增步兵七十二名乾隆十年裁汰
兵三百名十八年以右營遊擊改爲都司裁兵五名
二十六年奏請添設額外外委卽於馬兵內拔補三
十五年撥歸下江營兵丁一百五十名四十六年裁
兵三百一十一名又於是年酌議鎮標添兵七百六
十六名四十九年裁步兵十二名添馬兵十二名歷

至嘉慶十九年實存兵二千四百名又於二十年裁
兵一百九十八名又於道光十二年每百名內裁兵
二名現總兵官一員遊擊一員都司一員守備三員
分防一員千總六員分防一員把總十二員分防二
員外委十八員分防二員額外十二員兵二千一百
十名分防滾縱汎右營守備千總各一員外委
一員兵一百八十四名王嶺汎中營把總一員兵四
十六名小都江汎左營把總一員兵五十六名八匡
汎中營外委一員兵五十五名三營分設水陸十九
塘朗洞營駐劄叅將一員守備二員千總三員把總

黑南諸田卷二十二
六員外委七員馬步守兵七百八十五內分防寨嵩
汎千總一員兵一百二十名高表汎外委一員兵四
十名嶺賈汎外委一員兵三十名其分防定旦汎係
上江協標駐劄遊擊一員千總一員外委三員兵三
百五十名八開汎係上江協分駐把總一員兵五十
名每年兵糧舊由粵省撥米一萬石支剩餘米轉運
朗洞營乾隆二十三年停運粵米議於都勻府都勻
縣八寨廳獨山州三脚壘黎平府開泰縣並經歷司
各處買撥供支都勻五處共米三千五百四十四石
八斗八升運至三脚州同倉交收由廳備船運回古

州黎平三處共米九百二十一石六斗七升八合逕
運古州倉交收其每年例應會同朗洞縣丞代買古
州朗洞二營兵米九百七十五石係赴糧庫請領轉
發各土弁採買畱支鎮標兵米五百五十四石九斗
一升餘米四百二十石九升卽由該縣丞支給朗洞
營糧又代買朗洞營分防三汎兵折色米四百七十
五石二斗係由該營自行領價轉發左右衛買米運
交縣丞收支其起運之項每年額運朗洞收買兩衛
餘田租米三百七十八石嘉慶二十一年裁減朗洞
營兵丁四十一名減支米石卽畱支古州鎮營兵糧

今有戰格卷二十二
七

仍以二百五十五石運歸朗洞又於都勻等處輓運兵米內轉運寨嵩兵米一百九十四石四斗至八匡王嶺滾縱三汛需米四百九十七石六斗四升卽於所買百戶總小旗工食米內委交左衛千總自行支收此營制糧運之原委也雍正六年招撫苗民五百七十一寨計三萬一千五百二十六戶乾隆三十六年裁撥一百一十七寨歸下江通判管轄實計四百五十四寨二萬七千二百九十八戶百餘年來滋生蕃衍戶口較倍往時舊例大寨稱爺頭小寨爲洞崽洞崽聽爺頭役使每年有豚酒之餽今久禁止苗有

洞苗山苗水西苗徭苗獯苗五種內洞苗有黑洞白洞之分男子近皆雜髮習漢俗婦女仍青衣短裙山苗卽高坡苗喜住山巔衣服皆尙黑亦曰黑苗蓄髮跣足性最愚蠢以手掬食不用箸木刻示信水西苗衣尙青病不服藥信巫鬼女衣衿以絨錦爲之獯徭皆自粵遷來者統計洞苗山苗十之七水西苗獯徭十之一二尙無土司管轄設通事二十二名分管各寨乾隆四年軍務告竣準給通事以上千把總土舍之職分三等軍功由布政司頒給鈴記現存土千總六名土把總二名土舍七名場市三南城外以西曰

平引場以午日定旦場以巳日穀多種糯豐年每畝可收穀三十把每把可得倉斗八斗溶都二水兩岸皆山惟車江自樂鄉以下至廳城幾三十里之遙迤邐澗洄平原通坦榕樹參天榕城所由名也民食粵鹽自乾隆五年題準以古州爲總埠丙妹永從三脚車爲子埠每年額引五千九百二十六道計引六封二分零乾隆二十八年經廣東運使議粵省子店之例準古州埠引領餘引二封令子店在郡城折領運銷仍歸廳管理浮橋在上河街橫舟架板以鐵練繫之士人名爲永安橋醫局乾隆二十年設地多瘴癘

夏秋尤甚俗稱爲桂華瘴云按古州之地昔曾羈縻設官而其後益閉塞也明史土司傳稱宣德七年陳蒙爛土副長官張勉奏所司去衛遠地連古州生苗乞立堡並請調泗城州土兵一千鎮守之則其頑梗可知矣我

朝定鼎後逆賊吳三桂僞將馬寶兵敗於楚取道古州以竄滇諸苗獲其大炮火銃盔甲而內地奸徒教以施放之法並爲購造鍊器製火藥於是諸苗日事仇殺又往往窺伺內地抄畧爲患雍正六年督臣鄂爾奏奏請先其近而易者由凱里進兵八寨丹江清江

黔南諸苗卷二十二 九
等苗次第平定以巡撫張廣泗前守黎平時有謬冲
之役於古州苗情地利最熟咨廣泗開古州以七年
二月進兵至九年七月始平逮廣泗調赴西路軍營
十三年八妹高表交烏交歪等寨逆苗復糾合號召
蹂躪州縣復

命廣

泗爲經畧揚威將軍以下皆聽節制廣泗以蠢爾愚
苗所以力能抗拒者以生熟苗夷羣相附和官兵進
攻一處各處爲之協助聲援賊勢愈張兵氣日怯至
於熟苗之附和者罪雖難追究非首惡驅之愈急則
悉竄入新疆爲之出力拒守非所以渙散賊勢也若

不直搗新疆殲其首惡則黨羽終難解散因籌畫時
勢審度地形酌定分兵三路同時進攻逆苗各保巢
穴彼此不及救援則我力專而彼力分以整擊散一
舉可定遂以三路兵先凱里清江台拱又以兩路兵
一路先丹江至八寨一路先朗洞至古州又以八路
兵勦牛皮箐餘孽廣泗由凱里移駐清江自清江前
赴古州經由上江八寨丹江一路仍旋凱里自正月
迄九月軍務告竣是歲乾隆元年也迄今百餘年來
苗民食德服疇與編氓無以異蓋我

朝

之式廓無外信乎軼殷周而邁漢唐矣於戲偉哉

下江通判

下江通判在府治南一百八十里省城東南七百八十里

國朝雍正十一年開闢設營置汛駐黎平府潭溪司吏目一員乾隆三十六年因滾唐逆苗香要滋事裁吏目將貴陽府新城通判改駐下江特設廳標轄下江營左哨二司把總一員戰守兵丁四十三名撥古州一百一十七苗寨及開泰屬之苗岑等九寨永從屬之蘇洞等一十二寨均歸通判管轄其境東至府屬宰己寨界五十里南至廣西思恩縣屬因洞寨界一

百二十里西至古州廳屬八吉寨界七十里北至府屬平有寨界五十五里東南至廣西羅城縣屬歸江寨界七十里西南至都勻府荔波縣屬巴容里界一百六十里東北至府屬歹里寨界四十里西北至開泰縣屬社里眞銀寨界三十里城周二里計四百五十丈其東北爲朋論山南爲巖雞山西南爲烏地山霧凞山皆距城百里以外者也都江由古州八吉寨入廳界逕廳城之西南歷蠟鷲扒沙諸處至丙妹入粵西孖女江在城西南自加墨加堵東郎等寨流出又有小河逕黨組加磨加則諸寨來注之又有孖覽

江在城東南自寨正加坳等寨流出由郎洞寨南來注之又有才瓦寨在城南三十里雍正七年下江滾唐才瓦二寨相結爲梗總兵董芳等抵蘇洞危峯障日鳥道懸糧率兵攀援葛藤而上將近才瓦殺數十人殲其首惡又分剿加洞始各逃竄諸寨咸相繼就撫下江遂定卽此也又有地名九千里在城西南一百六十里土人因其內寬廣妄稱爲九千里其實西接古州之碎拉寨南接粵西思恩屬之大棚地方西南接荔波之拉義寨僅數百里耳萬山叢雜久爲生苗巢穴外人無與往來乾隆五十年後始有漢人入

山伐木者嘉慶中黔楚軍興有鎮筸銅仁紅苗竄入其中詭爲生苗佃種地土紅苗故黠而生苗故闇未之覺也後遂稍稍侵佔陰埋碑記於土內給生苗共掘之指爲祖業生苗無以解於是生苗老果等始悉其眾以逐紅苗勢頗洶湧經有司訪聞會同文武立時彈壓押紅苗歸故土而罪生苗之殺紅苗者以是得安堵此道光三年事也所屬山由瘠壤不成畝數額徵條馬正銀二十四兩八錢有奇耗銀三兩四錢有奇秋糧米三石七升有奇耗米變價銀一兩二錢常平倉貯穀一萬五千七百五十一石七斗無學校

苗童附入府屬考試寄居民籍附入府屬分別考試
通轄熟苗一百餘寨五千六百戶有奇凡三種洞苗
住平坡及河上俱雜髮高坡苗住山巔苗髮挽髻於
前獐苗係由廣西遷來者亦畜髮挽髻耕種爲生性
情淳樸風俗甚陋駐城遊擊一員雍正十一年設守
備一員千總二員把總四員兵五百名每年
買苗糧米一百八十石四斗由八寨同知運米七百
三十八石九斗八升由都勻縣運米一千三十八石
又採買運交備支兵糧米四百石一斗二升又轉運
丙妹縣丞兵米二百八十二石遊擊營設十五塘西

至古州爲水路北至府城爲陸路餘與首縣同

黔南識略卷二十二終

